

Niueqatigiinneq siammasinnerusok, nunanut allanut ammanerusok, imaatigullu assartuussinissamik attaveqaasersorneqartoq qanoq isilluta pilersinneqassanersok pillugu siunissami niuernikkut nunarsuarmioqataajartornermut aqut atorlugu apeqquteqaat aallaavigalugu oqallisissiaq.

(Inatsisartuni ilaasortaq Aqqalu C. Jerimiassen, Atassut)

Akissuteqaat

(Inuussutissarsiornermut, Nukissiuuteqarnermut Iisimatusarnermullu Naalakkersuisok)

Inatsisartuni ilaasortaq Aqqalu C. Jerimiassen oqallisissiatut siunnersuuteqarnera Naalakkersuisut sinnerlugit qutsavigissavara.

Ukiuni takkuttussani aningaasaqarnikkut ineriartornermut assut eqqartorneqartup pingaaruteqartuusok Naalakkersuisut isumaqarfigaat.

Ullumikkut nunarsuatsinnik niueqateqarneq nunatsinnut nunatsinniillu, kiisalu nunatsinni illoqarfiit nunaqarfiillu akornanni immakkut usinik assartuinissamut Royal Arctic Linemut kisermaassisinnaatitaaneranut toqqammavigisat iluanni pingaarnertut pisarpoq.

Taamaalilluni nunatsinni inuiaqatigiinnut umiarsuaatileqatigiit inuuniarnikkut pingaavissuupput. Nunatsinni umiarsualivinnik 13-inik Royal Arctic Line ingerlassaqarpoq, Aalborgimilu immikkoortoqarfeqarluni. Nunatsinnut nunatsinniillu immakkut assartuineq akuersissuteqarfiusok ullumikkut Aalborg aqutugalugu pisarpoq. Taamaattorli assartukkat Islandimit, USA-mit aamma Canadamit pisut Reykjavik aqusaarlugu pisarlutik.

Ukiuni kingulliunerusuni Royal Arctic Line A/S nutarsaanermik ingerlatassamik aallartitaqarsimavoq, tamatumalu siunertarpiaa tassaavoq inuussutissarsiorfimmut soorlulusook atuisartunut iluaqutaasussamik eqaannerullunilu nutaaliaanerusumik immakkut angallannermi iluserisassap qulakkeernissaa.

Pineqartut tassaapput allannguutit annertuut arlallit, ilaatigut nunatsinnut nunatsinniillu angallannerup nunat tamalaani angallaffiusartunut akulerulluarnunissaanik qularnaarinissamik anguniagaqartut.

Nutarsaanermik ingerlatami aamma ilaasimapput ingerlatseqatigiiffiup aqqissuussaanerata nukittorsarnera, it-mik aqqissuussivinnik allanngortiterinerit, minnerunngitsumillu angallatinik nutaanik pissarsinissamik siunertaqarluni aningaasaliinissamik ingerlatassaq annertoq.

Amerlanerpaanit ilisimaneqartutut allanngortiterineq oqitsuusimannngilaq. Taamaattumik 2019-imi maajip qaammataani ingerlatseqatigiiffiup ataatsimeersuarnerani Royal Arctic Linep naatsorsuutit nalunaarutillu saqqummiussaasa usinik assartuussinermik aqqissuussaq nukittorsagaasoq pillugu takorluukkamut ingerlatseqatigiiffiup eqqortumik ingerlalersimaneranik takutitsinerat nuannaarutissaavoq.

2018-imi angalasarnissamut pilersaarutaasup tutsuiginassusiata pisimasunut allanut naleqqiullugu nalunaarsugaasuni pitsaanerpaamik inissisimaffeqarnera ingerlatseqatigiiffiup ataatsimeersuarnerani Royal Arctic Linep ilisimatitsissutigaa. Tikinnissamullu pilersaarutit malillugit iluatsittut 88 %-iusimalluni. 2017-imi piffissaq eqqorlugu tikittartut taamaallaat 36 %-iusimapput.

Taamatuttaaqaq Royal Arctic Line aamma Eimskip suleqatigiinnissaq pillugu ingerlariaqqissinnaanerani Islandimi unammilleqatigiinnermut pisortaqaarfiit maannakkut akuersissuteqarsimanerat nuannaarutissaavoq.

Umiarsuaatileqatigiit umiarsuarnik nutaatut sanartukkanik pingasunik 2.150 TEU-ni piginnaasaqassutsimik agguataarisarnissaannik suleqatigiinnerup nassatarissavaa. Umiarsuit marluk Eimskipip pigissavai, kingulleq Royal Arctic Linep. Umiarsuaatileqatigiit taakku marluk akornanni peqatigiilluni angalasarnissatut pilersaarutip 2019-ip naanerani aallartisarneqassanera maannakkut naatsorsuutigineqalerpoq.

Qulequttami *"Kalaallit Nunaat ajornannginnerusumik niueqatigineqarsinnaanngortipparpur"* atorlugu iluaqutissanik arlalinnik Royal Arctic Line inississuisimavoq. Iluaqutissat piukkunnarnerpaat akornanni makku taaneqarsinnaapput:

Nunatsinnut nunatsinniillu ukioq tamaat sapaatip akunnikkaartumik angalasalissaagut, tamatumalu qulakkiissavaa eqaannerusumik avataaniit assartugassat aamma nunatsinniit assartugassanut pilersaarusiorneqarsinnaaneri.

Royal Arctic Linep nunanut tamalaanut attaveqartunut umiarsualivinnut amerlanernut attaveqarfissat pilersaarutigai.

Reykjavik aqqutigalugu Amerika Avannarleq immakkut angallavigineqassasoq pilersaarutaavoq. Torshavn aqqutigalugu Tuluit Nunaaliartoqartassaaq. Asia niuffaffiillu allat Aarhus aqqutigalugu angallavigineqassapput. Tamakku saniatigut Islandimut, Savalimmiunut aamma Sverigemut toqqaannartumik attaveqarfissat pilersaarusiugaapput. Pilersaarutit najoqqutaralugit sapaatip akunneri allortarlugit paarlakaallugit Polen aamma Norge tikinneqartassapput.

Angalanissamut iluseq nutaaq nunarsuarmi umiarsuaatileqatigiinnik suleqatigiinnissamik periarfissiisaaq.

Niuffaffimmut nunatsinniit avammut nioqqutigisat taamaasillugik umiarsuakkut assartugarinissaannik avammut toqqaannarnerusumik nioqquteqartartut siunissami isumaqatigiissutigisinnaassavaat. Tamanna tunisassianik nioqquteqarneq nunatsinniit toqqaannarnerusumik pisinnaalissaaq.

Royal Arctic Line-ip nunarsuarmi nutaanik assartuinerisa ilusilersorneqarnerat Sikuki Harbour-ip nutaamik nutaaliaasumillu Nuummi containereqarfeqalernerata tapersorsorpa.

Aamma suliassa qarfinni allani inuussutissarsiorfimmut assartuinermit tunngasutut toqqammavigisatut atugassarititaasut Naalakkersuisut aamma Inatsisartut nutarsaavigisimavaat.

Sermip aamma erngup avammut nioqqutigineranut Naalakkersuisut periusissiaanni nutaami immakkut assartuinermit naleqqiullugu oqilisaasoqarpoq. Taamaalilluni sermimit imermillu isumalluutit immakkut assartugarinerinut RAL-ip kisermaassisinnaatitaanerata atussannginnera sermimut imermullu inatsimmi nutaami takuneqarsinnaavoq.

Kisermaassisinnaatitaanermit pinngitsuuisitsineq nunatsinni sermip erngullu iluaqutiginnissaanik aningaasaliinissaq aningaasaqarnikkut kajungernerulissasoq, taamaalillunilu nunatsinniit unammillersinnaanerulersitsissasoq naatsorsuutigineqarpoq.

Inuussutissarsiorfimmi immikkoortortanut allanut assingusumik assartuinerup tunngaatigut pinngitsuuisitsisoqarpoq, soorlu umiarsuarni tankilinni uuliamik assartuinerit, aamma assartuinermit naleqqiullugu suliaqarfigisamut allanut ilaatitatus nammineq umiarsuaatigisami usinik assartuinerit. Aammattaaq aatsitassanut ikummatissanullu inatsimmi ilaasunik suliarisanut atatillugu suliaasunut Royal Arctic Linep kisermaassisinnaatitaanera atuutinngilaq.

Islandimik aamma Savalimmiunik qanimut quleqateqarnissap pingaartuuneranik siunnersuummik saqqummiussaartoq Naalakkersuisut isumaqatigaat. Taamaalilluni nunat avannarliit killiit amerlasuutigut oqaloqatigiissuteqarfigineqartareerput, siunertarineqarluni periarfissanik ersarissaanernik, suleqatigiissutigineqarsinnaasut assigiinngitsutigut ataatsimoorfigisinnaasagut eqqarsaatigalugit.

Taamanikkut EF-iusumit Kalaallit Nunaata anineranik tunngaveqartumik Islandip aamma Kalaallit Nunaata killilersugaanngitsumik niuernissamik isumaqatigiissuteqareernerat aamma ilisimatitsissutigineqarsinnaavoq.

Tamakku pillugit Inatsisartut aalajangiussinerat naapertorlugu Islandimi nunatta sinniisoqarfissaanik Naalakkersuisut pilersitaqarsimapput. Reykjavikimi sinniisoqarfik naalakkersuinermi niuernermilu pingaarutilittut attaveqarfinnik ineriartortitseqqinnissamik nukittorsaanissamillu ilapittuuteqarpoq, tamannalu nunatsinnut inuiaqatigiinni aningaasaqarnikkut iluaquteqartitsissasoq naatsorsuutigineqarpoq.

Naggasiutigalugu assartuisarnermik aqqissuussarisatta nutarsarnera nunat tamalaanut niueqatigiinnitsinnik tamarmiusumik sapinngisamik pitsaanerpaamik tapersorsuisuusasaanera Naalakkersuisut nalilersuutigaat. Tassunga atatillugu Kalaallit Nunaannut niuffaffiit pingaartut annertuut tassaammata Europa aamma Kangia Ungalleq eqqaasitsissutaassaaq.

Aalisarnermik isumaqatigiissutigisatsigut EU-mi niuffaffiusunut nunatsinnit aalisakkat tunisassiat akitsuusigaanngitsunik attaveqarfeqarput. Tamatumunnga ilanngullugu Kalaallit Nunaat nunatut OLT-mik taaguuteqartutut (Oversøisk Land og Territorie – Nunat

Naalagaaffiillu Imarpiup Akianiittut) ittuunermigut EU-p iluani niuffaffimmut akitsuusigaanngitsumik attaveqarfeqarpugut. Aammalu ingammik Kinamut Japanimullu annertuumik tunisaqarfiusunut Asiami niuffaffinnut niuernermi attaveqarfiusut naammaginartumik ingerlasuunerat maluginiassallugu pingaartuuvoq.

Naggasiutigalugu Naalackersuisut sinnerlugit pilersitarpassuit tamakku nunarsuarmi avatangiisitsinnik niueqatigiinnermut pitsanngorsakkamut toqqammavissanik pilersitsinermik suliasaqarfinni arlalinni Naalackersuisut ingerlataqarluarnerat eqikkassutigissavara.

Sammissaq pillugu Inatsisartut oqallilluarnissaat Naalackersuisut kissaatigaat.